

## Degun daz per i aciasés

15-10-2009

Sciche an à podù audì dai media vegniràl metù su l'ann che vegn n daz per passé sun i joufs dolomitics. Dessegur sun l'Jouf de Frea y sun chel dl Sela, ma al vegn rejoné ence dl Ciaulonch. Sceben che la couta nueva arà consequenzes posoces per la mobilité dla popolazion dles valedes ladines, é les informazions sun chest argoment dutaorela scialdi pueces.

Marco Pizzinini, vize-president dla Generela.

N stude dl&rsquo;EURAC sun i vantajes y i desvantajes dl pedaje ne é nia ciamò vegnù publiché. Tant aut che l daz sarà y ciuna regolamentazion che é preveduda per la popolazion locala ne él nience ciamò vegnù fat al savei. Cie condizions él pa prevedù per i nia puec pendolars interladins (personal de scola, colaboradours di istituc culturai, dla Union Generela, y e.i.), ciunes per les manifestazions interladines (&bdquo;Di dla Cultura Ladina&ldquo;, &bdquo;Di dla scola ladina&ldquo;, &bdquo;Di dla Unité ladina&rdquo;, y e.i.)?

En cont de chest à la popolazion ladina l dert de vegnì informeda tant tost che al é meso y te na maniera menuda. N daz ne daidará aboncont de segur nia passé via plù saurì i confins aministratifs dla Ladinia ysia tripartizion. Al contrar: i contac interladins che é bele sen puec patirà ciamò de plu. I son dla minonga che chesta consequenza dla couta nueva ne é ciamò nia vegnuda touta en conscidrazion assé. Sce l daz essa da vegnì apliché zenza ezezions per la popolazion locala, fossa i ladins la soula mendranza al mond che pò comuniché te sie raion demé tres stredes a paiament. Da na valeda sciche Fodom, per chela che Bornech é tres ciamò n zenter de referiment per la scola, per l ospedal o per compré ite, ne podéssen nia plu ruvé te Südtirol zenza paié.

Per via de chestes consequenzes pesoces ti damana ciamò n iade la Union Generela a duc chi che é responsabli per la dezijion de prevedei na soluzion che tegn cont dla popolazion locala. N bon ejempl de chest vers onse pu dret davejin: l tunel Felbertauern anter Matrei tl Tirol dl Est y Mittersill te Salzburg che pò vegnì anuzé debant da la jent dl Osttirol, ajache al reprejenteia n colegament intern emportant con la zité de Dispruch. Da chest ann él ence la jent de Mittersill che pò passé l tunel debant. Cie che é poscibel tl Tirol messessa ben ence ester meso tl Südtirol a ben dla picera mendranza ladina spidiceda su te trei pertes.

Nos ti damanon ai politics responsabli de conscidré y limité les consequenzes negatives dl daz per i contac interladins. I envion dantaldut la Lia di Comuns ladins, che é pu avisa vegnuda metuda su per traté de tel argomenc, de formulé na posizion unitara sterscia al ben dla popolazion locala.

Marco Pizzinini,

Vizepresident dla Union Generela di Ladins dles Dolomites